


Biyete di 500 florin, "Mero", emití

ORANJESTAD - Banco Central di Aruba a pone den circulacion entrante ayera un biyete di banco di 500 florin y un moneda di 5 florin.

E biyete di 500 florin ta muestra na e banda dilanti e imágen di e piscá "Mero-Epinephelus Morio", mihor conocí como "Mero", y e texto di e biyete di 500 florin ta "wettig betaalmiddel, Centrale Bank van Aruba".

E diseño moderno ta tanto encuanto tema como estilo en continuacion di e serie existente di biyete di banco di Aruba. Cada biyete ta muestra un sorto di animal cu ta existi na of rond Aruba. E figuranan di animal bunita diseñá ta poní den un dibujo di forma geométrico. Na e otro banda di e biyete, e dibujonan geométrico



aki ta combiná cu motivonan decorativo cu ta wordo hayá riba cerámica precolombiano na Aruba, enfatizando asina aki e relacion di pasado y presente. Pa mas informacion tocante e serie di biyete di banco, por consultá e foyeto "Centrale Bank van Aruba, bankbiljetten serie 1993" (na Hulandes y

Inglés), cu ta obtenible na e banco mencioná.

E moneda di 5 florin ta muestra na e banda dilanti e texto "Beatrix Koningin der

Nederlanden", cu e imágen di e perfil di Reina Beatrix cu ta riba e monedanan existente. E otro banda tin e texto "Aruba, 5 florin", e aña di emision, cu e

imágen di e escudo di Aruba cu tambe ta aparecé riba monedanan existente. E moneda ta cuadrá, tin un diameter di 26 mm, ta trahá di níckel y staal, y na un forma bunita ta completá e serie di moneda di Aruba.

E moneda di 5 florin lo bai circulá por lo pronto hunto cu e biyete di 5 florin. Despues di tempo e biyete di 5 florin lo bai sali for di circulacion.

Tanto e biyete di 500 florin como e moneda di 5 florin ta diseñonan di e conocido diseñador Arubano Evelino Fingal, kende tambe a diseñá e serie di biyete di banco y di moneda existente. □